

摘藻堂四庫全書薈要

子部

欽定四庫全書薈要

子部

御定淵鑑類函卷四十二

欽定四庫全書薈要卷一萬一千四百八十九

子部

御定淵鑑類函卷四十一

帝王部二 帝王總裁

帝王總裁五

歲頌

贊



晉潘尼乘輿箴曰皇極肇建兩儀既分彝倫未序

萬邦糾紛國事明主家奉嚴君各有攸尊德罔不勤煌煌四海藹藹萬乘匪賢焉倚匪哲焉憑左輔右弼前疑後丞一日萬幾業業兢兢夫出其言善則千里是應而

莫余違亦喪邦有徵辛作璿室而夏興瑤臺糟丘酒池
象箸玉杯叔世道衰末俗化淺耽樂逸遊荒淫沈湎不
式古訓而好是佞辯不邇正路而覆車是踐滅敗之功
載在前典匪唯陵夷厥世用殄故曰樹君如之何將民
是司牧視之猶傷知其寒燠故能撫之斯柔而教之斯
睦無遠不懷靡思不服夫豈厭縱一人而玩其耳目內
迷聲色外荒馳逐不修政事而終於顛覆 增唐張蘊
古大寶箴曰今來古往俯察仰觀惟辟作福為君實難

主普天之下處王公之上任土貢其所求具僚陳其所
倡是故恐懼之心日弛邪僻之心轉放豈知事起乎所
忽福生乎無妄是以聖人受命拯溺亨屯歸罪於己因
心於民大明無私照至公無私親故以一人治天下不
以天下奉一人禮以禁其奢樂以防其佚左言而右事
出警而入蹕四時調其慘舒三光同其得失故身為之
度而聲為之律勿謂無知居高聽卑勿謂何害積小就
大壯九重於內所居不過容膝彼昏不知瑤其臺而瓊

其室羅八珍於前所食不過適口唯狂罔念丘其糟而
池其酒安彼反側如春陽秋露巍巍蕩蕩恢漢高大度
撫茲庶事如履薄臨深戰戰慄慄用周文小心詩之不
識不知書之無偏無黨一彼此於胸臆捐好惡於心想
衆棄而後加刑衆悅而後行賞弱其強而治其亂伸其
屈而直其枉故曰如衡如石不定物以限物之懸者輕
重自見如水如鏡不示物以情物之鑒者妍蚩自生勿
渾渾而濁勿皎皎而清勿汶汶而闇勿察察而明雖冕

旒蔽目而視於未形雖黠纊塞耳而聽於無聲縱心乎
湛然之域遊神於至道之精扣之者應洪纖而效響酌
之者隨深淺而皆盈故曰天之經地之寧王之貞四時
不言而代序萬物無言而化成豈知帝力而天下和平

李德裕丹扆六箴曰先王聽政昧爽以俟鷄鳴既盈
日出而視伯禹大聖寸陰為貴光武至仁反支不忌無
俾姜后獨去簪珥彤管記言克念前志

宵衣箴

聖人作

服法象可觀雖在宴游尚不懷安汲黯莊色能正不冠

楊阜慨然亦譏縹紈四時所御各有其官非此勿服惟

辟所難

正服箴

漢文罷獻詔還駟騶轡輶徐驅焉用千

里厥後令王亦能恭己翟裘既焚筒布則毀道德為麗
慈儉為美不過天道斯為至理

罷獻箴

惟后納誨以求

厥中從善如流乃能成功漢驚沈湎舉白浮鍾魏叡侈

汰凌霄作宮忠雖不忤而善亦從以規為瑱是為塞聰

納誨箴

居上處深在察微萌雖有讒慝不能蔽明漢之

孝昭叡過周成上書知詐照姦得情燕蓋既折王猷洽

平百代之後乃流淑聲

辨邪歲

天子之孝敬遵王度安

必思危乃無遺慮亂臣猖獗非可遽數玄服莫辨觸珥
始仆柏谷微行豺豕塞路覩貌獻飡斯可戒懼

防微歲

宋陳彭年大寶歲曰二儀之內最靈者人生民之中

至大者君民既可畏天亦無親所輔者德所歸者仁恭
已臨下輝光益新載籍斯在謀猷備陳內綏萬國外撫
百蠻治亂所始言動之間觀之則易處之則難由是先
哲喻彼投艱苟能慮未乃可防閑審求逆耳無惡犯顏

既庶而富教化乃施慈儉之政庶富之基鰥寡孤獨人
之所悲發號施令宜先及之黃髮鮐背心實多知左右
侍從何莫於茲瞻言百辟咸代天工儻無虛授可建大
中克謹彰瘡惟藉至公知人則哲視遠則聰才固難備
道亦少同葑菲固捨杞梓乃克不扶自直惟蓬在麻非
揀莫見惟金在沙參備顧問必辨忠邪獻替以正裨益
無涯自區草澤亦有國華訪此髦士可拒朋家三章之
立庶民作程欽哉欽哉可以措刑九伐之建寇孽是平

本仁本義可以弭兵是謂齊禮亦曰好生有教無類自
誠而明宗廟社稷饗之以恭宮室苑囿誠之在豐春蒐
秋獮不廢三農擊石拊石用格神宗使人以悅乃克成
功治國以正罔或不從濟濟多士用之有光硜硜小器
謀之弗臧忠言致益宣讓膏粱六藝為樂寧後笙簧任
賢勿貳堯所以昌改過不吝湯所以王六合至廣萬彙
攸多風俗靡一嗜慾相摩如馭枯索若防決河左契斯
執六轡遂和導之以德民免嬰羅不懈於位俗乃偃戈

先王之訓罔不咸然吾君之治亦取斯焉小心翼翼終

日乾乾三靈降鑒百祿無愆由茲率土永戴堯天巍巍

洪業億萬斯年 明王弘誨無逸殿箴曰大君凝命統

御萬方總攬威福調劑紀綱得之則化臻上理失之則

治用不臧故克艱者惟后而不易者惟王緬惟聖人自

強不息度天祇民不遑暇食保惠念稼穡之艱抑畏勤

康田之即享國以之彌長后王因而不忒式宣如叔季棄

小忽微以天位為可樂捐小民之所依履冰無兢兢之

戒集木無惴惴之危迷途既遠覆轍何追是用攬鏡興
亡提衡善敗取公旦之陳謨法成王之受戒比前事若
韋弦奉聖言如著蔡揭無逸於便殿拜昌言於往代夫
適情肆欲其逸乃足無亦誦耽樂罔壽之旨以自畜而
伐性之斧不使陳於目勞民動衆其逸乃重無亦鑒觀
逸遊田之訓以自訟而馳騁之娛不使投其空輕改舊
章其逸乃長無亦咎變亂刑政之文以自防而紛更之
議不以易其常不恤衆怨其逸乃見無亦引違怨呪詛

之規以自善而防川之術不以施於賤淫刑窮兵其逸
乃盈無亦懲無罪無辜之語以自繩而草菅之念不以
瀆其經嗚呼一念之逸萬事之隳一時之逸終身之疵
法天行健惟日孜孜惟聖罔念無不在茲堯兢舜業並
稱巍巍惟無逸乃能有逸惟有為是以無為彼秦氏之
衡石隋室之傳餐徒為叢脞奚取圖難吾將企四王之
迪哲措九有於安瀾固朝乾夕惕之不暇而遑即夫世
主之所安 李大武仁明武箴曰惟辟統天懋建皇極

運治穆清秉機淵默包體用以兼該治剛柔而作則蓋
聖學本乎惟一而衆美貴乎相參欲提綱而挈領必體
一而函三體仁長人萬善斯括亶聰明而作后亦神武
而不殺博施濟衆惟仁是保苟予仁之未導赤子蒼生
胡繇而昭融威命靈爽惟武斯懾苟予武之弗烈敷天
率土胡繇而震疊勿恃終食為仁而謂人欲不能淆不
見山木得養則長失養則消勿恃一隙為明而謂私意
不能隔不見盆水澄之終朝撓之一掬勿恃意氣為武

而謂事變不能翫不見強弩張之甚難弛之甚易匪直
殘忍傷仁即優游姑息亦亂仁之真匪直壅蔽害明即
苛求淵察亦失明之情匪直婁矯攻武即剛愎拒諫亦
用武之誤嗚呼衆人之仁杯水車薪聖心之仁純純全
全如天施地生合蠕動而咸育斯其為天下之至平衆
人之明螢火陰燐聖心之明昭昭靈靈如日照月臨悉
豐蔀而畢照斯其為天下之至深衆人之武怒臂當車
聖心之武赫赫皇皇如雷厲風行舉百昌而咸懷斯其

為天下之至威既公溥而明通亦有仁而有勇繫三劄
之所陳實百王之攸重雖異用而同體總會歸於一中
苟三德之不愆何萬化之難通斯皇猷之要領而君道
之折中托前疑而授簡敢上告於宸聰 申時行思政
軒箴曰惟皇睿聖光嗣丕基弗寧燕處有儼若思厥思
維何萬幾一日千里應違謀之几席惟皇立政欽若昊
天涵育萬彙覆被八埏曰雨曰暘思其或愆惟皇立政
憲於列祖金科玉條具在故府是訓是行思繩厥武四

海惇嫠政是用康一夫不獲我視如傷何以亢之行葦
甘棠殊方卉服政是用輯一夫不戒作我蠹賊何以清
之苞桑磐石萬方玉食思及鉏耜袞服在御思及杼機
徵輸罔藝乃政之疵筐篚之恩用思有式尚方之需費
思有極濫出無經乃政之隱任思弗二或蔽其聰去思
弗疑或撓其公母昵厥比衡平鑑空言逆於耳思或為
利言遜於心思或為戾母恣厥情虛心執契勿謂已明
察見淵魚勿謂已斷決事庭除思古哲王用人有餘勿

謂予喜賞或為僭勿謂予怒刑或為濫思古哲王監於
成憲朝以出政則思其終紛更之戒畫一之從夕以修
令則思其始毋徇窳辭毋眩多指是之為思規安萬世
天命不易為君實難人亦有言日中則是無疆惟恤思
之思之鬼神通之戶牖誦之王肯堂敬天勤民箴曰
天佑下民作之君師握持大寶令行如馳外馳八荒內
牧九域日照月臨罔不恭職匪民有私匪天有親德配
彼蒼澤闡下民配蒼維何曰惟皇畏顧視罔儋夙興夜

寐澤民維何詢民之瘼一夫怨咨罔自豫樂匪獨郊禘
穆穆嚴趨觸然後敬中心已渝匪惟執馭兢兢若朽感
然後勤勤何能久古之敬民所以敬天自民視聽敢云
不然冕旒蔽目目周天壤黈纆塞耳耳藏羣響一日不
御萬方昌承晏亦安耳如民予憎巍巍放勳今古致理
究厥所操欽明而已虞戒逸樂夏訓風愆虎賁綴衣周
之韋弦雖有成德從諫斯聖雖有蒨蕘賢於卑佞不辭
諤諤用讚皇輿小臣獻箴敢告周廬 王象節保泰箴

序曰自古所以維國體振人心者莫急於全盛之日而
潛伏乎渙散懈弛之形何則殷憂多難庸愚驚焉熙洽
恬愉聖喆玩焉譬若太行羊腸謹於轡勒或無虞於登
坂而康衢有覆轍則忽而墮也吞天沃日慎其維楫尚
無虞於洪濤而平瀾有敗舟則狃而壞也殷宗納彤日
之諫而消桑穀周宣有脫簪之警而遣採薇均為中興
尚矣不然開元天寶建中靖國豈非極盛際哉而一域
不戒禍不旋踵可鑒也夫我二祖興創聖統列聖茂衍

鴻基皇上紹繹二十年於茲德化翔洽威靈赫濯休容
在列戎夷北面即有一二烽燧之儆而陰陽內外截然
界限不可謂非當保泰之時顧瑕類漸萌精神漸墮風
俗漸偷紀綱漸亂苟無桑土之謀不免厝火之禍敬循
藿見少效虞箴其詞曰惟辟奉天為君實難克艱厥后
保泰為先大象維何金甌常完九譯稽顙四國歌弦鳳
鳴於岡嵩祝其年無平不陂無往不還黔黎鉏耰遂生
戈鋌所以聖王日夕糾虔戶牖綢繆其忘永監仰觀盈

虛俯勤宵旰九嬪八子寢豈不甘長樂昭陽樂豈不縣
言念幾康勿溺便媚懼生耽毒戒彼晏安晝日三接清
蹕常傳九塞三陲念念周旋以克長世太平永肩於赫
皇明聖人當天勤政講學帝德罔愆濟濟朝列夔龍同
賢爰惟今日消長攸關願言保泰皇心無倦母曰昌明
輦轂之下或成夷羌母曰富有黔黎之賤或抗元首明
明股肱惟泰則親母令三事嘗隔九閭赫赫金城惟泰
則豫弗使元良忽生間阻慎之又慎側席求理億萬斯

年受天無斃小臣獻箴毋怠毋忽 劉孔當保泰箴曰

可畏非天可愛非時其倏其忽為治為圯皇皇泰運亦
孔之昌豈不爾穀以豫以康顧此安兮危之所倚顧此
存兮亡之所始譬彼行棋見在莫必累躋而勝食兩而
失譬彼馳車惟厥所馭或險而戒或夷而躓蓋常人狃
於眉睫而禍幾伏於隱微惟兢兢其馭朽乃明明其丕
基古我先王有懷如履衣袽未濟桑土未雨豈不馨格
地祥天符曰余不德胡以介茲豈不咸若羽毛肉角曰

余小子孤寡不穀豈不率俾旅獒越雉曰余不及而享
其贄蓋旱則資舟水則資車用持盈以豫而挾傾以時
嗚呼念哉治耶忽耶判若蒼素揆厥所由寘惟人寘何
去何從孰臧孰否微臣獻箴以告丹陛

原贊魏陳王曹植庖犧贊曰木德風姓八卦創焉龍瑞
名官法地象天庖厨祭祀罍網漁畋瑟以像時神德通
玄 晉摯虞庖犧贊曰昔在上古惟德居位庖犧作王
世尚醇懿設卦分象開物紀類施罍設網人用不匱

王彪之伏羲贊曰悠悠皇犧體寂神澄無為而化出道
之凝不知有之冥感自興因應之跡畫象結繩 魏陳
王曹植女媧贊曰古之國君造簧作笙禮物未就軒轅
纂成或曰二皇人首蛇形神化七十何德之靈 又神
農贊曰少典之胄火德承木造為耒耜導民播穀正為
雅琴以暢風俗 晉摯虞神農贊曰神農居世通變該
極民衆獸獸乃教稼穡聚貨交市草木播植務濟其本
不通其飾 魏曹植黃帝贊曰少典之孫神明聖哲土

德承火赤帝是滅服牛乘馬衣裳是制氏雲名官功冠
五列 又黃帝三鼎贊曰鼎質文精古之神器黃帝是
鑄以像太乙能輕能重知凶識吉世衰則隱世和則出
晉曹毗黃帝贊曰軒轅應玄期幼能總百神體鍊五
靈妙氣含雲露津摻石曾城岫鑄鼎荆山濱豁焉天扉
闕飄然跨騰鱗儀轡灑長風褰裳躡紫宸 周庾信黃
帝見廣成畫贊曰治身紫府問政青丘龍湖鼎沒丹竈
珠流疎雲即雨落木先秋至道須極長生可求 晉摯

虞黃帝贊曰黃帝在位實號軒轅車以行陸舟以濟川

弧矢之利弭難消患垂衣而治萬國乂安 魏曹植少

昊贊曰祖自軒轅青陽之裔金德承土儀鳳帝世官鳥

號名職殊別系農正扈氏各有品制 又帝顓頊贊曰

昌意之子祖自軒轅始誅九黎水德統天以國為號風

化神宣威暢八極靡不祗虔 又帝嚳贊曰祖自軒轅

玄囂之裔生言其名木德帝世撫寧天地神聖靈察教

弭四海明並日月 又帝堯畫贊曰火德統位父則高

辛克平共工萬國同塵調適陰陽其惠如春巍巍成功
配天則神 晉摯虞唐堯贊曰唐帝放勳欽明文思惟

天為大惟堯則之巍巍蕩蕩萬邦雍熙 周庾信帝堯

登壇受圖贊曰登壇洛汭沉玉河湄丹圖馭馬綠甲乘

龜榮光上幕休氣連帷雖存克讓于見文思 魏曹植

帝舜贊曰顓頊氏族重瞳神聖克協頑瞽應唐涖政除

凶舉俊以齊七政應歷受禪顯天之命 晉夏侯湛虞

舜贊曰有虞悃悃揖讓鼓琴垂拱臨民詠彼南音世澄

道玄天下混心民思王度如玉如金 庾闡虞舜像贊

并序曰夫至道玄妙非器象所載靈化潛融非軌迹所傳故道資沖樸則謂之三皇德被羣生則號稱舜禹是以先王因其會通制為準極功格於天則配於上帝法施於民則載在祀典然後名教彰於至治王道煥乎無窮故茲堂之構也有自來矣然樹寢所以栖神而寢非神之所期立像所以表德而像非德之所存若乃廢其軌景洞其玄真雖冥照之鑒獨朗而天下惡乎注其耳

目哉遂乃顯圖靈像廓其廟壇俾天光焜於宇宙南風
散乎五絃豈謂神道之妙可寄之於有涯哉蓋亦暢悠
悠者之心也其辭曰玄像焜耀萬物含靈飛龍在天陽
德文明神道雖寂務由機生擁琴高詠寄和五聲玄風
既暢妙盡無名民鑒其朗孰測窈冥周庾信舜干戚
畫贊曰平風變律擊石來儀先齊七政更服三危朱干
獨舞玉戚空麾南風一曲恭己無為魏曹植夏禹贊
曰吁嗟夫子拯世濟民克卑宮室致孝鬼神蔬食薄服

紼冕乃新厥德不回其誠可親亶亶其德溫溫其仁尼
稱無間何德之純 又禹治水贊曰嗟夫夏禹實勞水

功西鑿龍門疏河導江梁岐既闢九州以同天錫玄圭
奄有萬邦 又禹渡河贊曰禹濟於河黃龍負船舟人

並懼禹歎仰天予受大運勤功恤民死亡命也龍乃弭
身 周庾信禹渡江贊曰三江初鑿九谷新成風飛鷁
涌水起龍驚樂天知命無待憂生危舟遂靜亂楫還平
晉摯虞夏禹贊曰決隄疏河刊山數土四隩既宅彝

倫攸序卑宮非食以寧區宇

魏曹植殷湯贊曰殷湯

伐夏諸侯振仰放桀鳴條南面以王桑林之禱炎炎克
償伊尹佐治可謂賢相 又湯禱桑林贊曰惟殷之世

炎旱七年湯禱桑林祈福於天翦髮斷爪自以為牲皇
靈感應時雨以零 周庾信湯解網贊曰連珠兩起合

璧雙沈穀為祥樹桑成樂林三方落網一面驅禽德以

行政仁乎用心 晉摯虞殷湯贊曰睿也惟商實惟成

湯三五迭興舍帝稱王 增魏曹植文王贊曰於赫聖

德實惟文王三分有二猶服事商化加虞芮旁暨西方
王業克昭武嗣遂光 原又文王赤雀贊曰西伯積德
天命攸顧赤雀銜書爰集昌戶瑞為天使和氣所致嗟
爾後王昌期而至 晉摯虞周文王贊曰周文翼翼儀
刑體教上帝是臨神明是勞東鄰之昏西鄰之曜九有
既集以聖易暴 周庾信文王見呂尚贊曰言歸養老
垂釣西川岸止磐石谿唯小船風雨未感意氣怡然有
此相望于今幾年 魏曹植周武王贊曰桓桓武王繼

世滅殷咸在尚父且作商臣功加四海救世濟民天下
宗周萬國是賓 晉摯虞周武王贊曰於皇武王天命
是鍾七德既曜莫不率從奄清宇宙盪商之蹤 魏曹
植周成王贊曰成王繼武聖賢保傳年雖幼稚岐嶷有
素初疑周公終焉克寤旦奭佐治遂至刑措 又周公
贊曰成王即位年尚幼稚周公居攝四海慕利罰叛柔
服祥應仍至誦長反政達天忠義 周庾信成王刻桐
葉封虞叔贊曰虞叔百里居河之汾帝刻桐葉天書掌

文禮以成德樂以歌勲天子無戲唐其有君 晉摯虞

周宣王贊曰宣王承衰邦家多阻懲難思理官人以叙

山甫補闕方叔禦侮是用中興恢復周宇 魏曹植漢

高皇帝贊曰屯雲斬蛇靈母告祥朱旗既抗九野披攘

禽嬰克羽埽滅英雄承機帝世功著武湯 晉傅玄漢

高祖畫贊曰赫赫漢祖受命龍興五星協象神母告徵

討秦滅項如日之升超從側陋光據萬乘 摯虞漢高

祖贊曰漢祖明達兼資權武總御羣雄翦翕強楚奄正

華夏經略區宇遂登天位繼堯之緒 周庾信漢高祖
置酒沛宮畫贊曰遊子思舊來歸沛宮還迎故老更召
歌童雖欣入沛方念移豐酒酣自舞先歌大風 增唐
睿宗漢高祖贊曰天造草昧雄圖糾紛赫赫漢祖應若
興雲秦隴鹿喪沛澤蛇分大風一起南面稱君 原晉
摯虞漢惠帝贊曰孝惠內修親親外禮宰相優寵齊悼
趙隱恩敬篤矣聞孫叔通之諫則色瞿然納曹相國之
對而心大悅可謂寬仁之主遭呂太后虧損至德悲夫

魏曹植漢文帝贊曰孝文即位愛物檢身驕吳撫越
匈奴和親納諫赦罪以德讓民殆至刑措萬國化淳

晉摯虞漢文帝贊曰漢之光大實惟孝文體仁尚儉克
已為君按轡細柳抑尊成軍營兆南原陵不崇墳 魏

曹植漢景帝贊曰景帝明德繼文之則肅清王室克滅
七國省役薄賦百姓殷昌風移俗易齊美成康 又漢

武帝贊曰世宗光光文武是攘威震百蠻恢拓土疆簡
定律厯辨修舊章封天禪土功越百王 周庾信漢武

帝聚書贊曰獻書路廣藏書府開秦儒出谷漢簡吹灰
芝泥印上玉匣封來坐觀風俗不出蘭臺 增宋范蔚
宗光武贊曰炎政中微大盜移國九縣颺迴三精霧塞
民厭淫詐神思反德世祖誕命靈貺自甄沈機先物深
略緯文尋邑百萬貔虎為羣長轂雷野高旗芻雲英威
既振新都自焚虔劉庸代紛紜梁趙三河未澄四關重
擾神旌乃顧遞行天討金湯失險車書共道靈慶既啓
人謀咸贊明明廟謨赳赳英雄斷於赫有命系隆我漢

原晉傳玄漢明帝贊曰肅矣孝明仗法任刑勤綜萬機
察下以情未弘道治用致太平專信俗儒非禮之經

增宋范蔚宗漢明帝贊曰顯宗丕承業業兢兢危心恭
德政察姦勝備章朝物省薄墳陵永懷廢典下身遵道
登臺觀雲臨雍拜老懋惟帝績增光文考 又漢章帝

贊曰肅宗濟濟天性愷悌於穆后德諒惟淵體左右藝
文斟酌律禮思服帝道弘此長懋儒館獻歌戎亭虛候
氣調時豫憲平人富 原唐太宗晉宣帝贊曰仲達猜

忌狼顧為人稱疾迷謬形神不親辛毘仗節蜀將貽巾

委質北面終為魏臣 增唐太宗晉文帝贊曰世宗繼

文邦權未分三千之士其從如雲世祖無外靈關靜氛

反雖討賊終為弑君 又晉惠帝贊曰惠帝居尊臨朝

聽言厥體斯昧其情則昏高臺望子長夜奚寃金墉毀

冕蕩陰釋曹及爾皆亡滔天來遘 又晉明帝贊曰傾

天起害猛獸呈災琅邪之子仁義歸來龔行趙璧命簪

荆臺雲瞻北海江望南開晉陽禦敵河西全壤胡寇雖

艱靈心弗爽三方馳騫百蠻從響寶命還昌金輝載朗
明后岐嶷軍書接要莽首晨懸董臍昏燎厥德不回餘
風可劭又晉孝宗贊曰委裘稱化大孝為宗遵彼聖
善成茲允恭西旌玉壘北旆金墉遷殷舊熒莫不來從
哀后寬仁惟靈既集海西多故時災見及彼異阿衡我
非昌邑梁蕭子顯南齊高帝贊曰於皇太祖有命自
天同度宇宙合量山淵宋德不紹神器虛傳寧亂以武
黜暴資賢庸發西疆功興北翰偏師獨克孤旅霆斷援

旆東夏職司靜亂指斧徐方時惟伐叛抗威京輦坐清
江漢文藝在躬芳塵淵塞用下以才鎮民以德端已雄
睟君臨尊默苞括四海大造家國 又南齊武帝贊曰

武帝丕顯徽號止戈韶嶺歇侵彭派澄波威承景厯肅
御金科北懷戎款南獻夷歌市朝晏逸中外寧和 原

唐太宗梁武帝贊曰緬維梁武九五居尊何為自屈沈
冥釋門災興佛寺兵纏帝閤竟罹凶逼天道寧論 增

唐李德裕武宗真容贊曰唐運中興天授大君軒耀其

武堯煥其文北伐獫狁漠朔無氛西伏堅昆稽首稱臣
稭生壺關盜起河汾沉機先物雄斷解紛克定羣慝竟
全大勲八表既寧萬幾益勤爰命采績載模天真崑閬
仙岑峻極秋旻蓬瀛白日光照清晨涵育如天尊嚴如
神輝赫綢緼為龍為雲聖作物覩禎祥以臻宣光乃孕
虞熙載甄致建中和金聲玉振太階既平廟器乃陳化
下以德持盈以仁四瀆宗海衆星拱辰億萬斯年藻朗
日新

原頌晉牽秀黃帝頌曰邈矣皇軒應天載靈通幽遠覽
觀象設形誕敷厥訓彝倫攸經德從風流化與雲征皇
猷允塞地平天成爰登方岳封禪勒成紛然鳳舉龍騰
太清違茲九土陟彼高冥民斯攸慕涕泗沾纓遐而不
墜式頌德聲 增晉陸雲漢高祖盛德頌曰於皇漢祖
纂胄有唐平章在昔文思百王丹輝栖列火精幽光爰
茲聖緒頽維弛綱靈曜燿爍濟景扶桑則天未墜重規
是蒼其規伊何橫乾作峻厥德不回矩地能順有秦不

競罔拯黔首震驚予師思處神主上帝曰咨有鑒有赫
乃眷伊漢此惟予宅明明聖皇既受帝社雲騰下邑風
駭泗水仰鏡天文五緯同晷俯察雲符神母爰止思文
聖王克廣克遐威凌羣桀德潤諸華爰祀天人天人攸
嘉爰輯蒸徒所和既和既和既順乃矢德音豐沛之旅
其會如林朱旗虹超彤旆電尋推師蕭曹撫劒高吟元
戎薄伐時罔不龕凌波川潰肆野陸沈咸陽克沴既繫
秦后戕戕阿房乃清帝宇穆穆聖皇天保攸定有項畔

換不式王命王命既愆黜我西土於鑠王師遵時匪怒
爰赫乘疊席卷三夏嘽嘽戎軒矯矯乘馬變伐強楚至
於垓下天誅薄曜暴籍授首區夏既混宇宙蒙又肅肅
帝居巍巍神器有皇于登是臨天位繡文于裳組華于
黻明明天子有穆其容至止鏘鏘相惟辟公宣聲路寢
發號紫宮頌此愷悌以畜萬邦思樂皇慶協於時雍琴
瑟在御太子舞功越裳委贄肅慎來王明明聖皇闔國
乘制分圭祚勞河山命誓禮律克彰典文垂藝有漢恢

恢疏罔不替聖功克明九方孔安良宰內幹武臣外閑
漸澤冀域沾被戎蠻連光大業萬載不刊 隋薛道衡

隋高祖功德頌曰太始太素荒茫造化之初天皇地皇
杳冥書契之外其道絕其跡遠言說所不詣耳目所不
追羲軒以降爰暨唐虞則乾象而施法度觀人文而化
天下帝王之任可重聖哲之道為尊夏后殷周之國禹
湯文武之主功濟生人聲流雅頌然陵替於三五慙德
於干戈秦君閔位用刑名為政本漢執靈圖雜霸道而

為法當塗興而三分峙典午末而四海亂九州封域窟
穴鯨鯢之羣五都遺黎蹴蹋戎馬之足雖元行定嵩洛
木運據穀函未止滄海之流詎息崑山之燎叶千齡之
旦暮當萬葉之一朝者其在大隋乎粵若高祖誕聖降
靈則赤光照室韜神晦迹則紫氣騰天龍顏日角之奇
玉理珠衡之異著在圖籙彰乎儀表而帝系靈長神基
崇峻類邠岐之累德異豐沛之勃起龍躍鳳翔濡足援
手應赤伏之符授玄弧之籙命百戰百勝之將動九天

九地之師廓氛霧於區宇出黎元於塗炭天柱傾而還
正地維絕而更紐殊方稽顙識牛馬之內向樂師伏地
懼鐘石之變聲萬姓所以樂推三靈於是改卜壇場已
備猶弘五讓之心億兆難違方從四海之請光臨寶祚
展禮郊丘舞六代而降天神陳四珪而饗上帝乾坤交
泰品物咸亨酌前王之令典改易徽號因庶民之子來
移創都邑天文上當朱鳥地理下據黑龍正位辨方揆
景於星日內官外座取法於辰象懸政教於魏闕朝羣

后於明堂除舊布新移風易俗八荒無外九服大同四海為家萬里為宅乃休牛散馬偃武脩文爰命秩宗刊定五禮申勅太常改正六樂玉帛尊俎之儀節文乃備金石匏革之奏雅俗始分而留心政術垂紳聽覽早朝晏罷廢寢忘餐憂百姓之未安懼一物之失所行先王之道夜思待旦革百王之弊朝不及夕見一善事喜彰於容止聞一愆犯歎深於在予薄賦輕徭務農重穀倉廩有紅腐之積黎萌無阻饑之慮天性和恕仁慈惻隱

恩加禽獸胎卵於是獲全仁霑草木牛羊所以勿踐至
於憲章重典刑名大辟伸法而屈情決斷於俄頃故能
彝倫攸序上下各肅左右絕諂諛之路縉紳無勢力之
門小心翼翼敬事於天地終日乾乾誠慎於無極陶黎
民於德化致風俗於太康公卿庶尹遐邇岳牧僉以天
平地成千載之嘉會登封降禪百王之盛典宜其金泥
玉檢展禮介丘飛聲騰實常為稱首天子為而不恃成
而不居沖旨凝邈固辭弗許而雖休勿休上德不德更

乃潔誠岱岳遜謝僊咎方知六十四卦謙撝之道為尊
七十二君告成之義為小巍巍蕩蕩無得以稱焉而深
誠至德咸達於穹壤和氣薰風充溢於寓縣二儀降福
百靈薦祉日月星象風雲草樹之祥山川玉石鱗介羽
毛之瑞歲見月彰不可勝紀古語稱聖人作萬物覩神
靈滋百寶用此其效矣庶馮豪翰敢希贊述昔堙海之
禽不增於大地泣河之士非益於洪流盡其心之所存
忘其力之所及輒緣斯義不覺斐然乃作頌曰五運叶

期千齡肇旦赫矣高祖人靈攸贊聖德挺生神謀獨斷
瘳惡彰善夸兇靜難宗伯揆儀太史練日孤竹之管雲
和之瑟展禮上玄飛禋太一珪璧朝會山川望秩占揆
星影移建邦畿下馮赤壤上叶紫微布政衢室懸法象
魏帝宅天府固本崇基匈奴瀚海龍荒狼望種落陸梁
時犯亭障皇威遠懾帝德遐暢稽顙歸誠稱臣內向勾
越提封斗牛星象積有年代自相君長大風未繳長鯨
漏網授鉞天人豁然清蕩禮教周備車書大同復禹之

迹成舜之功禮以安上樂以移風憂勞庶績矜育黔首
三面解羅萬方引咎納民軌物僉登仁壽聖化隆平生
人熙阜虔心恭已奉天事地協氣橫流休風紹至壇場
望幸云亭虛位推而不居聖道彌粹齊迹姬文登發嗣
聖道類漢光傳莊寶命知來藏往玄覽幽鏡鼎業靈長
洪基隆盛尚想睿圖永維聖則道洽幽明仁霑動植爰
畫不陳乾坤將息微臣作頌用申罔極 原唐太宗頌
曰厥初造化人倫既興乃建君長司牧黎丞肇自爰畫

爰代結繩軒昊既謝唐虞以升後隋德衰順時革命三
季之末干戈是爭赫矣神武經期作聖下括九圍上齊
七政業統文武勲邁高光何險不濟何患不攘士女胥
悅筐厥玄黃斯物之至昭於我王我王覆育資生懷造
配堯登唐方周在鎬翕受敷施明徵定保允迪厥德惟
清帝道帝道欽明天下和平三時不害百穀以成我庾
斯積如坻如京既富而教訟息刑清明明天子令聞不
已百姓為心萬方在已家賴寬政朝稱多士齊一華戎

混同書軌東池溟渤西苑嵎丘八蠻職貢六狄懷柔至

德潛洽玄化滂流日慎一日雖休勿休先天不違靈物

效質丹羽儀韶翠黃承轡甘露零草祥風應律嘉禾醴

泉比焉自出符瑞見兮煥圖書壇場設兮望鑾輿至人

忘已體中虛凝神姑射厭宸居厭宸居叶冥契龍駕升

兮邈遐逝垂玄範兮光來裔與玄象兮長昭晰飛英聲

兮越三代永錫祚兮億萬載 顏師古聖德頌曰緬尋

遐代詳觀往冊五勝質文三正沿革亂多化畚明寡晦

積炎精既淪大運斯斁茫茫率土黯焉已夕皇矣大聖
誕受天符雲飛九域電擊八區共工慝斃涿鹿妖除枝
換斯撤攬槍靡餘建武戢刃偃伯舛車蠲苛削密求瘼
恤隱琴瑟更張銜策俱盡滿堂已樂聲誦猶軫扇暘垂
仁泣辜流憫吏勉端潔民歸愿謹肅恭禋祀祇事上天
永惟孝享式備吉蠲外崇耆耄內睦親婣歲時縑繡春
秋醴饌筑聲是恤痾瘵斯痊閭閻外戶馬牛內廩畎畝
相移康莊交讓勿用桴鼓無虞亭障賁納鮫人朔班狼

望至誠感慶休氣致祥馴擾一角棲集五章華平挺幹
朱草曜芳良耜畋多稔穰穰國儲億庾家登萬箱旌
彼髦彥任仗忠力光被心膺列居槐棘如砥之平如矢
之直淑慎微務精明品式菁菁者莪芄芃彼棫脩容禮
闡翱翔書圃談極五際翫慕三古眇義窟恢宏學府
儒墨兼陳申韓迭去豈資伯亮寧勞封鉅德音高朗絲
言昭普黃竹麗章柏梁清引沈鬱澹雅疏通敏迅抽演
闕文網羅遺韻孰登奧室罕窺墻仞妙心洞達神筆允

從磔硤新勢奮發竒峰珪稷鈎婉霧散煙濃竦同企鶴
蔚若據龍豈唯於趙信乃過鍾道惟天縱藝兼人術用
而不知速而不疾至德無象微言罕述玉裕桂宮金植
蘭室禮極敬愛行歸忠一天下文明日月貞觀百神受
職三靈叶贊泰階既平光華常煥超軒跨昊騰周軼漢
萬壽無疆永延遐算 李百藥皇德頌曰臣聞聖人與
天地合其德與日月合其明含吐陰陽之氣彈壓山川
之精叶吹萬以亭育總得一而為貞我所以誕膺明命

大保鴻名 又曰惟皇唐之獨運冠風聲之往初練五
氣於圓蓋張四極於方輿定羣雄之逐鹿拯方割之為
魚在炎靈之交喪屬皇輿之敗德降薦瘡於上玄恣咆
哮於中國無小無大圖帝圖王匹夫匹婦為螽為蟹舉
率土而咸棄雖同舟而作慝彼獨夫之肆志何汨典而
亂常固違道而滅德實罔念而作狂始結怨於庶黎終
自絕於彼蒼八荒九有山潰川竭天軸且迴地維將絕
文章咸盪風雅咸缺在忘良而必焚罄冠冕而同裂或

滔天而嫁禍或觸山而作孽極殷區以陸沈盡漢塗而
喋血天縱神武景屬上皇自白水而龍躍肇參墟而鳳
翔在中塗而聽誦將再駕而翦商惟神機之獨運乃撫
翼而高驤命蒼兕而臨河曲殺黑龍而濟冀方指牧野
而泰誓師鳴條而侮亡 又曰惟聖德之懷遠敷彞倫
於絕漠合綦會而作貢極遐方而獻琛薦環裘而委質
候風海而歸心周八荒而率俾重九譯而相尋效狻猊
於昧谷維神屏於鄧林應咸池而率舞遊上苑而懷音

竭寶用而咸競罄虛心而畢舉乍鳴觀閣時遊禁籞文
表仁義聲諧律呂下神雀於帝臺導甘泉於神渚龜書
龍匣河圖將遊東鰈西鷄云亭載佇其餘藏山秘澤之
珍撫實排虛之侶俱叶契於圖牒差無得而稱序 又
曰昔天靈萬八千歲姬周三十六王蓋厯數之眇小曾
不足以揄揚惟聖朝之期運符上帝之會昌臣下拜而
稽首獻福壽之無疆資卜年與卜厯共地久而天長
增唐一行明皇起義堂頌曰并州起義堂者皇天造帝

之初高祖誓衆之地隋氏失御國亂無家小道自賢大
才胥忌上帝不敵黎人咸戚六軍踰海而東敗萬乘過
江而南覆豺狼入邑狻猊爭人黔首囂然方將無訴我
高祖感之乃龍躍晉水鳳翔太原百神前驅萬姓來奔
用湯武之兵靜新室之亂遵唐虞之緒承太王之基率
百官受終於文祖輯五玉班瑞於諸侯類圓禋方之禮
備封功爵德之議允約法惟簡代虐以寬子惠困窮懷
柔蠻貊金石一變日月重華近古以來未有革命易姓

若此之盛者也非天私我有唐惟天祐於積德非唐求
於人庶惟人懷於累仁當此之時太宗內啓聖謀外行
專斷躬擐甲胄跋履山川駕英雄而為奧主一區域而
定大業周詩曰昊天有成命二后受之信今之謂也於
戲先后捨元子而立予主鬯煩大位而付予天下自高
祖創業百有六戰欽承丕緒十有四載東西南北無思
不服山川鬼神亦莫不寧寧惟藝祖儲福之所致豈予
幼孫菲德之能及方將運心於玄妙之境勵志於造化

之爐發令為祥符施惠為霖雨任賢為兩曜仗能為四
時俾溥天之下有形者遂全懷生者自足樹鋪野繭田
種嘉穀斷彫為樸捐珠棄玉追大庭而齊風夢華胥而
同俗非曰能爾願憑宗祏而效焉癸亥之歲獻春正月
濟河橫汾省方展義存問黎老緬慕本邦城郭巋然桑
梓如舊覽風物之憂思尋王業之艱難惟高祖若天地
之開闢化成萬類惟太宗若日月之照臨光於四表肇
基發迹實在於茲前人有言曰禮不忘本樂保其德如

姬詠周原劉歌沛邑思我烈祖如聞歎息之音嗟爾後
人無忘成功之頌頌曰皇矣上帝臨下有赫降監四海
求人之瘼吁彼隋煬其政不獲眷我高祖此惟其宅高
祖誕靈騫飛晉陽萬夫一心元戎啓行火旗炎炎雲鳥
洋洋五星迓漢萬國謳唐天網恢疏王師節制威惟連
戮老生摧斃山祗引軍河龍渡帝渭倉散積離宮弛閉
關輔來蘇遠方咸惠長安宮室上法太微隋遷寶鼎唐
在璿璣仗入雙闕詔出九圍三靈協載百祿同歸帝謂

太宗表正封略濤蕩颶埽霆馳電爍劒不摧鋒弩無再
曠西平汧隴東取河洛杲密德充頭懸面縛北走獯鬻
南達蠻荆遼碣作乂梁岐底平海隅蒼生莫不來庭於
昭義堂誓衆資始天命所起於胥頌美維予小子夙夜
敬止於戲皇王緒思不忘 呂溫皇帝親庶政頌曰臣
聞光宅大寶茂育羣生神而明之必在上聖然則所同
者道所異者時或以垂拱仰成或以勵精自致及乎俗
躋仁壽理洽時邕弛張之政不殊勞逸之功則倍我皇

帝體至化含元精苞乾綱履坤順誕膺駿命恢纂鴻休
宣八聖之重光集百靈之奧祉如天之燾如地之容鼓
義為雷霆奮仁為風雨幹璇衡而轉七曜懸金鏡而納
九圍廓氛沴而川澄沓禎祥而山委百姓不知其日月
羣臣無望於清光而乃業邁乎前王功高乎古烈聖作
物覩孰知其源陛下自代天統物之初則以屈己濟人
為意虔臨庶政窮總萬樞四策賢良六親郊祀夏景昃
而方食寒星在而求衣寸陰不捨於論思子夜獨觀乎

啓事除一物之患而品類以安伸匹夫之冤而庶獄自
直棄瑕而錄用含垢而有過小善可紀必拔於宸衷片
言有孚不忘於睿聽至如天時之豐約地利之夸險邦
賦之盈虛師律之貞暴閭閻之疾苦稼穡之艱難人風
之情偽吏治之得失莫不密歸神算潛納皇明雖陰陽
不能以氣欺雖鬼神不能以形遁何細而不及何大而
不包何祕而不彰何難而不就猶復登臺念在險之慘
聞樂思向隅之情御裘感短褐之寒臨膳憂簞食之餒

日慎一日既泰而不自泰既安而不自安兢兢乎業業
乎此其所以廣運而有成全功之克舉者也然而感覆
壽之恩者欲天之彌高荷容載之德者欲地之彌厚仰
照臨之明者欲日月之彌光微臣被淳風飲玄澤親挹
行事親覩昇平憂勞誠難願陛下勉之而已美善誠盡
願陛下保之而已再拜稽首獻皇帝親庶政頌一首其
詞曰士師邁德玄皇儲慶幽而復曜高祖受命貞觀致
理開元殷盛艱而復康皇帝親政受命維何邈萬斯年

親政維何夕惕乾乾天道福謙我則奉天人生在勤我
則率先憂堯之心勞禹之形求人之瘼思國之經年亦
豐止御膳不馨夜如何其皇寢未寧脩文偃武太和氤
氲海不揚波天無纖氛鳥章之長推髻之君會朝明庭
其從如雲巍巍崇崇於穆昭融宜播大樂以宣皇風鏗
鐸盛德蹈厲神功下臣作頌永示無窮 明徐中行皇
帝即位頌曰於赫允烈在明八葉飭堪輿淬日月陛下
握元命之符御六龍而爰發敷淵聖之神孝稟后祖之

閔法竭宣告於皇祗洽七廟而周謁嗣適統以正祚信
大厯之攸協歲盛德之次離實蕤賓之紀節日維寅而
肇貞辰屆宵而未晰奏鏞鼓以伶倫運玉輿而啓闔踐
太微之法座暢九玄之間闔令德備矣穆穆皇皇吉儀
具戒既敕既匡肅肅法衛烈烈燎陽天軍奉翼雲旌抗
張於是百僚儼以趨進盛珮服之鏘鏘咸稽首以共臣
荷大禮以肅將登宗伯以錫詔覃濊澤於萬邦滌宿汙
而布化俗更始以向方將廣繼述之丕志準熙皞於陶

唐煥嘉釐之日
貺隆萬壽以無疆
猗兮休兮聖道明昌
小臣含慶聲流頌章

御定淵鑑類函卷四十一

欽定四庫全書薈要卷一萬一千四百九十

子部

御定淵鑑類函卷四十二

帝王部三 帝王總裁

帝王總裁六

述 誄 增 尊 號 冊 文 增 即位 冊 文

原述後漢班固高祖述曰皇矣漢祖纂堯之緒實天之
德聰明神武秦人不綱網漏於楚爰茲發迹斷蛇奮旅
神母告符朱旗乃舉粵蹈秦郊嬰來稽首革命創制三
章是紀應天順民五星同晷項氏叛援黜我已漢西土

宅心戰士憤怨乘釁而運席捲三秦割據河山保此懷

民股肱蕭曹社稷是經爪牙信布腹心良平恭行天罰

赫赫明明 又文帝述曰太宗穆穆允恭玄默化民以

躬率下以德農不供貢罪不收孥宮不新館陵不崇墓

我德如風民應如草國富刑清登我漢道 又景帝述

曰孝景莅政諸侯方命尅我七國王室已定非急非荒

務在農桑著於甲令民用寧康 又武帝述曰世宗魏

巍思弘祖業疇咨熙載髦俊並作恢我疆宇外傳四荒

武功既抗亦迪斯文憲章六學統一聖真封禪郊祀登
秩百神協力改正饗茲永年 又昭帝述曰孝昭幼沖
冢宰推忠燕蓋壽張實叡實聰罪人斯得邦家和同

又宣帝述曰中宗明明寅用刑名時舉博納聽斷惟精
柔遠能邇輝耀威靈不顯祖烈尚於有成 又元帝述
曰孝元翼翼高明柔克尊禮故老優游亮直外割禁囿
內損御服離宮不衛山林不邑奄尹之訾穢我明德
又成帝述曰孝成惶惶臨朝有光威儀之盛如珪如璋

壺闈恣趙朝政在王炎炎燎火亦允不揚 又平帝述
曰孝平不造新都作宰不伊不周喪我四海

原誅漢傳毅明帝誅曰惟此永平其德不回恢廓鴻績
遐方是懷明明肅肅四國順威赫赫盛漢功德巍巍躬
履聖德以臨萬國仁風弘惠雲布雨集武伏蚩尤文騰
孔墨下制九州上係皇極豐美中世垂華億載冠堯佩
舜踐履五代三雍既洽帝道繼備七經宣暢孔業淑著
明德慎罰尊上師傅薄刑厚賞惠慈仁恕明並日月無

有偏照辟如北辰與天同曜發號施令萬國震懼庠序
設陳禮樂宣布璿璣所建靡不奄有貢篚納賦如歸父
母正朔永昌冠帶僭耳四方共貫八極同軌 後漢蘇

順和帝誄曰天王徂登率土奄傷如何昊穹奪我聖皇
恩德累代乃作詞章其辭曰恭惟大行配天建德陶元
二化風流萬國立我蒸民宜此儀則厥初生民三五作
綱載籍之盛著於虞唐恭惟大行爰同其光自昔何為
欽明允塞恭惟大行天覆地載無為而治冠斯往代往

代崎嶇諸夏擅命爰茲發號民樂其政奄有萬國臣民
咸秩大孝備矣閔宮有恤由昔姜嫄祖妣之室本支百
世神契惟一彌留不豫道揚末命勞謙有終實惟其性
衣不制新屏玉遠屏履和而行威稜上古洪澤滂流茂
化沾溥不憖少留民斯何怙歔歔成雲涕泣如雨昊天
不弔喪我慈父 崔瑗和帝誄曰玄景寢曜雲物見徵
馮相考妖遂當帝躬三載四海遏密八音如喪考妣擗
踴號吟大隧既啓乃徂玄宮永背神器升遐皇穹長夜

冥冥曷云其窮 魏曹植武帝誄曰於惟我王承運之

衰神武震發羣雄殄夷拯民於下登帝太微德美旦奭

功越彭韋九德光備萬國作師寢疾不興聖體長歸華

夏飲淚黎庶含悲神翳功顯身沈名飛敢揚聖德表之

素旗乃作誄曰於穆我王曹稷肩周賢聖是紹元懿允

休先侯佐漢實惟平陽功成績著德昭二皇民以寧一

興詠有章我王承統天姿特生年在志學謀過老成奮

臂舊邦翻身上京表與我王兵交若神張陳背誓傲帝

虐民擁徒百萬虎視朔濱我王赫怒戎車列陳武卒虓
闕如雷如震攬槍北埽舉不浹辰紹遂奔北河朔是賓
振旅京室帝嘉厥庸乃位丞相總攝三公光受上爵君
臨魏邦九錫昭備大路火龍玄監靈蔡探幽洞微下無
偽情姦不容非敦儉尚古不玩珠玉以身先下民以純
樸聖性嚴毅平脩清一惟善是嘉靡疎靡昵怒過雷霆
喜踰春日萬國肅虔望風震慄既總庶政兼覽儒林躬
著雅頌被之瑟瑟茫茫四海我王康之微微漢嗣我王

匡之羣桀扇動我王服之喁喁黎庶我王育之光有天
下萬國作君虔奉本朝德美周文以寬克衆每征必舉
四夷賓服功踰聖武翼帝王世神武鷹揚左鉞右旄威
陵伊呂年踰耳順體愉忠肅乾乾庶事氣過方叔宜並
南嶽君國無窮如何不弔禍鍾聖躬棄離臣子背世長
終兆民號咷仰懇上穹既以約終令節不衰既即梓宮
躬御綴衣璽不存身唯紼是荷明器無飾陶素是嘉既
次西陵幽閨啓路羣臣奉迎我王安厝窈窕玄宇三光

不入潛闈一局尊靈永蟄聖上臨穴哀號靡及羣臣陪

臨佇立以泣去此昭昭於彼冥冥永棄兆民下君百靈

千代萬乘曷時復形 曹植文帝誄曰天震地駭崩山

隕霜陽精薄景五緯錯行哀殊喪考思慕過唐擗踴郊

野仰懇穹蒼考諸先紀尋之哲言生若浮寄德貴長傳

朝聞夕逝死志所存皇雖殪沒天祿永延何以述德表

之素旃何以詠功宣之管絃乃作誄曰元光幽昧道究

運遷乾迴厯數簡聖授賢乃眷大行屬以黎元龍飛踐

祚含契上玄五行定紀改號革年明明赫赫受命自天
風偃物化德以禮宣詳惟聖質岐嶷幼齡研幾六典學
不過庭潛心無內抗志高明才秀藻朗如玉如瑩聽察
無響視覩未形其剛如金其勁如瓊如冰之潔如砥之
平爵功無重戮違無輕心鏡萬機鑒照下情宅土之中
率民以漸道義是圖弗營厥險六合通同齊契共檢導
下以純民由樸儉緋冕崇麗衡紃惟新尊肅禮容瞻之
若神方牧妙舉欽於恤民虎將荷節鎮彼四鄰朱旗所

勦九壤披震疇克不若孰敢不臣懸旌海表萬里無塵
回回凱風祁祁甘雨稼惟歲豐登我稷黍家佩惠尹戶
蒙慈父在位七載九功仍舉將承太和繼跡三五宜作
物師長為神主壽終金石等算東父如何奄忽摧身后
土俾我孳孳靡瞻靡顧嗟嗟皇穹胡寧忍予明鑒吉凶
體達存亡深垂典制申之嗣皇聖上虔奉是順是將乃
啓玄宇基於首陽擬跡穀林追堯纂唐合山同阪不樹
不疆塗車芻靈珠玉靡藏百神警侍賓於幽堂於是候

大隧之致功陳元辰之淑禎潛華體於梓宮憑正殿於
居靈悼晏駕之既俟感容車之速征浮飛魂於輕霄就
黃墟以藏形背三光之昭晰歸窀穸之冥冥嗟一往之
不返痛閔闔之長局 晉陸機吳大帝誄曰我皇明明

固天寶生體和二合以察三精濯暉育慶懷祥載榮率
性而和因心則靈厥靈伊何克聖克仁茂對四象克配
乾坤齊明日月考祥鬼神誕自幼沖叡哲宿照甄化無
形探景絕曜巍巍聖姿文武既俊有覺德徽兆民欣順

將熙景命經營九圍登跡岱宗班瑞舊圻上玄匪惠早
零聖暉神廬既考史臣獻貞龍輶啓殯霄載紫庭辰旒
飛藻凶旗舉銘崇華熠爍翠蓋繁纓千乘結駟萬騎重
營簫鼓振響和鸞流聲動軫閭闔永背承明顯步萬官
幽驅百靈隨化太素即宮杳冥億兆同慕泣血如零

潘岳世祖武皇帝誄曰粵若稽古帝皇誕受休命作我
晉室赫赫文皇配天並日大行龍飛創制改物湛恩汪
濊流澤洋溢上齊七政下綏萬邦四門穆穆五典克從

惟清緝熙於變時雍愛盡事親教加百姓于喪過哀在
祭致敬后蠶冕服躬藉案盛六代畢奏九功咸詠行敦
醇樸思貫玄妙莅政端位臨朝光曜胄子入學辟雍宗
禮國老恂恂貴遊濟濟莫孝匪子莫悌匪弟化自外明
訓法以禮獷彼吳楚稱亂三代世歷五偽年幾百載邊
垂虔劉王化阻闕羽檄星馳鉦鼓日戒帝御羣師奉辭
奮旅腹心庭爭爪牙疑沮天監獨照聖策乃舉朝服濟
江止戈曜武野無交兵役不淹月僭號歸命稽顙晉闕

邪界蠻流傍納百越表閭旌善德音爰發虞人獻箴周
書垂誥酒懼其彝獸戒其冒于我大行縱心所好動不
踰矩性與道奧厭厭酣飲樂不辨顏桓桓振旅田無遊
盤我德如風民應如蘭靡不夙夜無敢晏安務農望歲
時或不稔小心翼翼恤民以甚御坐不怡撤膳賑廩西
流垂精南金抑施永言孝思天經地義問誰贊事英彥
髦士問誰翼待博物君子潛明神鑒從衆屈己道濟羣
生為而不恃先天弗違後天降時萬物熙熙懷而慕思

顯顯縉紳不謀同辭巖巖岱宗想望翠旗恭惟大行功
成不居議寢封禪心栖沖虛策告不足太平有餘七十
二君方之蔑如思樂天德等壽嵩華如何寢疾背世登
遐遷幸梓宮孤我邦家龜筮既襲吉日惟良永指太極
寧神峻陽羣后擗踴長訣輶輅聖靈斯顧豈伊不傷家
無遠邇邇邦靡小四海供職同軌畢會茫茫原野亭亭
素蓋縞輅解駕白虎弭旆龍輜即定玄闔載扃如天斯
崩如地斯傾哀哀庶寮烝烝自愍彼蒼者天胡寧斯忍

聖君不返我獨旋軫

宋謝靈運武帝誄曰九有同悲

四海等哀矧伊下臣思戀徘徊敢遵前典式述聖徽乃
作誄曰舜潛歷巖高晦泗渚龍德而隱風積乃舉皇之
遜世屯難方阻眷此區寰閔爾淪胥太乙之季權戚攜
薄隆安之初主相蒙弱岳牧糾虔朝廷紛錯妖橫乘隙
蛟噴鯨躍既擾奧區遂斥帝廛亂離斯瘼不後不先實
賴明哲授手康旃紀度迴薄餘分成閏舊晉中微偽楚
藉釁躡彼潛機整此英陳推亡必朽固存斯振盧循負

險肆慝遐嶺殄我江豫迫我臺省民既搖蕩國將遷鼎
乘騶歸轅式固皇境弘危濟險弭難釋殆虎騎騫隰舟
師漲海傾穴尋窠窮幽測昧昔去洛汭息肩江沚世更
十君年踰百祀國絕興復家成桑梓荒默莫恤頽國誰
恥夏典載禹九道是行商詔述湯蕪攻是并勤彼周流
協此經營仗鉞伐鼓赫赫明明乃敕衆師竟執戎昭誨
以三略惠以六韜雲撤周京席卷秦郊復禮前塋雪愧
舊朝既清西關復旋東道中憩徐豫蕪應燕趙業盛曩

代惠侔大造澤及四海功格八表悠悠聲教縣縣川陸
北獻羶裘南貢金竹髻首冠弁穿胸斂服寒穴欣日巢
栖玩屋匪惟遐譚靈物偕就孰是人事自天所祐甘露
芝草祥雲瑞宿嘉禾連木素鳥皓獸昔之所感謳頌同
音今之所應幽顯一心宋克虞德晉猶唐欽曰總八紘
于茲三齡四維開張九流昭明敦儉務素欽賢愛萌制
規作訓闡校修經禮樂已甄雲雨未弘將陟井陘薄埽
白登北朔渴望飛旌衡輞東岱靈遲玉牒金滕天地不

仁蒼生寡福已荷一過棄我何速梁顛木頽甘殞已贖
同軌畢至率土咸哀殊方均服樂樂素縗灑淚成雨響
叶如雷史臣考卜高山開基貞龜無遠遷靈有期嗣皇
擗標羣后崩悲孰云不戚痛百在茲惟徂之夕流火始
變秋月未永飛漏急箭鳴簫哀噉金觴虛奠列駕長隧
發輦華殿華殿既謝長隧是幸雙蓋躊躇六閑引領攀
援容貌眷戀俄頃哀哀百僚長辭含鯁奉教百朝執鞭
王始從履五牧年歷十祀天光下濟謬蒙眷齒愧微刀

筆頗預遊止垂幕侍講接筵餐理脩曙朗夕登臺泛沼
匪月匪日無晏無早如何一旦緬邈穹昊徽容未遠聖
靈超然收淚即路含戚何言風霜蕭瑟山海蒼茫地苦
情矜節速心傷孰是幽哀實戀我皇情思如環萱蘇豈
忘

增即位冊文唐賈曾玄宗即位冊文曰朕以寡昧虔奉
鴻休本殊王季之賢早達延州之節昔者聖歷已讓皇
嗣之尊暨至神龍終辭大弟之授豈惟衣冠所覩抑以

兆庶咸知頃屬國步未夷時艱主幼大業有綴旒之懼
寶位深墜地之憂議迫公卿遂司契象日慎一日以至
於今一紀之勞動亦至矣萬邦之俗化漸行矣將成夙
願脫屣寰區昔堯之禪舜惟能是與舜以命禹匪私其
親神器之重允歸公授皇太子某有大功於天地定阡
危於社稷溫文既習聖敬日躋委之監撫已移年歲時
政益明庶工惟序朕之知子庶不負時厯數在躬宜陟
元后朕方比跡洪古希風太皇神與化遊思與道合無

為無事豈不美歟王公百寮宜識朕意 賈至肅宗即

位冊文曰咨爾元子某惟天為大惟人君則之順乃德

故舜禹揖讓而履皇極咈乃道故丹朱商均不能保鴻

業是以啓有惠迪而夏嗣焉隋有亂紀而唐受焉五聖

之御極皆以勤儉兢業日慎一日故能享祚長久垂慶

無窮洎予六葉恭位四紀厭於倦勤緬慕汾陽當保靜

怡神思我烈祖玄素之道是用命爾元子當位嗣統於

戲爾有忠孝之誠極於君父爾有友愛之義信於兄弟

爾有仁恕之行通於神明爾有戡難之才彰於兆庶予
懋乃懿績嘉乃神武天之厯數在爾躬汝惟推誠禍亂
將冀爾而能清爾惟從諫社稷將冀爾而復寧佞言惟
疵直言惟師任賢勿貳去邪勿疑民非后孰理后非賢
罔與守邦欽哉慎乃有位無忝我祖宗之丕烈矣 德
宗即位冊文 闕換人姓名 曰昊天有命皇王受之立嫡以賢
春秋之義傳歸於子漢氏成規宗廟社稷實賴其慶咨
爾皇太子迺稟天地之仁合日月之耀道光三善孝著

十倫頃者國步多艱委以戎律理軍靖難保泰定功克

復帝圖廓清妖孽既表建侯之業俾承守器之重仁孝

之德夙夜惟寅朕天命有終弗興弗寤非至公無以主

天下非至法無以臨四海是用命汝陟於元后嗣守皇

業上繼宗祧下安羣望於戲宜遵太宗之法度肅宗之

儉約任賢勿貳去邪勿疑與衆守邦祇敬予訓 文宗

即位冊文

闕撰人
姓名

曰大行皇帝睿哲英能對天明命方

夏底績夷蠻貢庭罔有不端太康有截宜荷九廟之重

永享億年之祿豈虞奸妖竊發矯專神器蠱惑中外扇
誘羣朋駭動神人毒深梟獍咨爾江王某聰姿孕粹清
明毓和智算機關元謀電發躬率義勇大清兇徒且膺
當璧之符爰攄枕戈之憤既殲巨害當享豐福是用命
爾陟於元后永惟高祖太宗之翦定隋亂玄宗之浸漬
利澤憲宗之堅除蠹孽艱難險阻最乃負荷小心以事
上帝儉德以刑家邦懋于令聞持久如始敬之休哉
增尊號冊文唐李嶠上應天神龍皇帝冊文曰爰自厥

初肇興司牧皇矣撫極蒸哉察道莫不因時適變改物
殊徽推五運而陟崇高步三微而膺厯數天地人皇之
立始別洪荒唐虞夏帝之君漸詳文質姬水以推輪發
號烈山以斲耒增名然後仁被德宣功昭業遠歷訪前
古茲為舊式我大唐受乾坤之睠命當寓縣之謳歌奄
有黎蒸遂荒宸象陛下垂統御籙截海披圖承四葉之
休光握三靈之寶契虞舜蒸蒸之德永錫羣方周文翼
翼之心其凝庶績驅齊民於仁壽致雅俗於醇濃六府

咸脩五兵不用航海梯山之客奉贄輸琛畊田鑿井之
夫擊壤鼓腹中外靜謐表裏雍熙而孽子滔天亂臣干
紀謀同觸瑟禍劇弄兵不虞之災忽生於肘腋無象之
鑒獨憤於神祇於時凶豎逼樓聖君憑檻威靈下濟覺
封豕之周惶醜逆上瞻見神龍之傳翼寶仗以億千之
衛天威成丈六之容衆瑞俱臨羣祆大駭盡迷方而失
據咸喪氣而亡精顧盼而斬馘輦屍指揮而冰銷霧廓
雖復草為兵甲秦師驚蔣帝之神樹作幡幢釋主麾魔

王之衆虵軀之變媧后蛟影之隨漢高未足以匹此竒
微方斯偉應自非冥符幽贊睿感潛通何以承波若之
護持享高明之福助昔者伏牛之主是曰犧皇名鳥之
君仍題鳳紀法身用馬鳴成道上士以龍德為仙敢託
玄符爰咨故實謹上尊號曰應天神龍皇帝鴻猷載肇
昌歷惟新庶以仰順乾心俯從人欲天長地久更隆四
大之尊名玉振金聲恒為百王之稱首盛矣美矣皇哉
唐哉 李德裕會昌二年上武宗尊號冊文曰巨唐受

命繼體承業理運將至大君以興昊穹所以開至聖也
向者明兩未定帝華不協舍胤傳聖深惟至公先后所
以昭天命也亦猶堯發於唐侯文興於代邸神明之祚
不其難哉陛下清明溥鬯光耿四海玄德真鄰天休大
賚日角見表氣志如神爰初定命正心理物如辰居其
極而天下無邪矣由是昭德塞違尊賢遠佞禹不自滿
成不敢康自閨壺以施王教由家道而刑國風去比周
覆名實攬權綱析聖律脩舊典協成質抗嘉壇款太一

進正臣以端治表禮故老以求謹言遠無蔽獄近無留
令祈玄祖而膏雨降祀靈岳而嘉穀登省刑罰而蓬宇
清發倉廩而螽螟息去歲龍旂承祀大輅親郊捧玉瓚
而一獻光靈來格振金石而六變魄寶昭臨然猶古訓
是學緝熙於道天文炳煥雲漢其章溫恭敬遜承太任
之教和樂愷悌洽戚藩之心德風偃於羣黎威震重乎
絕域又以敬養不逮於長樂昭配未昇於禰宮每懷嗣
徽蒸蒸而慕所以奉若慈訓對越雨儀因心立志永錫

其教寬底劄之罪興惻隱之仁迴霜收電為之反汗及
單于慕義景附朔邊耀德戢兵謙臨是受至於備文物
展國容莫不先甲而布甘澤丁辰而廓陰翳斯所謂神
祇之心應矣天人之際交矣於是服冕之士戴鶡之倫
暨藩衛邦伯黃髮鮐背不謀而進曰陛下玄默天晬輝
光日新大矣孝熙四極爰臻誠宜玉版溫潤鏤鴻明之
德神寶焜耀薦億萬之年丕天大典不可辭也陛下猶
謙退固拒至於三四羣臣不已乃曰俞哉夫徧覆包含

之謂仁極深研幾之謂聖憲度著明之謂文蠻夷震懼

之謂武感而遂通之謂神無思不服之謂孝臣等謹奉

冊寶上尊號曰仁聖文武至神大孝皇帝伏惟陛下乾

健不息謙尊而光壽乃侔於殷宗德乃厚於成康貽燕

後昆受福無疆 李德裕會昌五年上武宗尊號冊文

曰臣聞昔在周宣玁狁內侵四牡薄伐以定王國焉則

詩人大其功暨於漢宣北夷乖亂呼韓慕義郅支遠遁

則簡策著其美惟此二代稱為中興伏惟皇帝表應龍

翼位合乾剛神全而正氣凝宇定而天光發智燭千里
動必察微心鏡萬機物來斯應於是五材用四維張建
中和之極舉前聖之綱重樞機脩法制斥背公之黨退
好逕之人內嚴體貌增堂陛之峻外絕締交抑輔車之
勢古所謂受命於天惟順獨正也又曰一心定而萬物
服惟陛下得之曩者北夷矜功耗蠹中國倒懸不解百
有餘年既而龍祠堙滅攜國款塞有狼顧平城之心鯨
吞咸洛之志爰命驍將搴旗刈旃兵鏖穹廬火烈荆棘

故名王結髮冠帶入臣堅昆稽首謁譯來獻而又奸臣
放命一紀陸梁據太行之固下窺洛邑通故絳之道旁
睨近闕肆其遺孽以竊兵柄議者僉曰精甲十萬積穀
十年泉魚不察湯網宜懸陛下雄斷霆聲羣疑冰釋揚
清風以埽雲鼓迅雷以破山任馮異則拔天井而震上
黨伏吳漢則發突騎而傾邯鄲壺關失險山東奪魄屬
有戍邊叛將竊發參墟人心搖蕩異議放肆陛下臨朝
而言曰二寇獲罪於天子所不舍未三旬而定晉陽纔

斯年而滅潞子不以金購豨將多降不勞師克粵首馳
報非至德感物孰能臻於此乎由是台宰百辟藩屏將
帥上言曰成伐東夷而肅慎來賀景翦七國而王室乃
安莫不始於武功終致刑措將以禋上帝薦祖宗宜受
鴻名以荅元貺 宋范質上太祖尊號冊文曰惟天為
大惟堯則之又曰舜有天下無為而理是以古之言道
德者莫先於二帝一則曰聰明文思一則曰溫恭濬哲
英聲茂實意無欲而自彰景福鴻休心無求而自至巍

魏蕩蕩無得而稱伏惟陛下高明博厚宣慈惠和純粹之德全孝友之行著惟精惟一知微知章向者龍尚處於潛淵日未離於暘谷歷試之際志在扶危險阻艱難何往不濟躍馬蹈高平之陣麾戈佐淮甸之征喋血鏖兵一月三捷勞旋飲至論功莫二洎乎天監厥德用集大命人祇叶應風雨咸若鼎運初建國步猶梗始則李筠犯順長戟指闕并人連禍寇我北鄙於是有太行之行重進怙亂棄德崇姦幅員千里生民被毒於是有廣

陵之役千乘萬騎如霆如雷詢彼仇方震疊區宇翠華
宵至堅城旦下連平二孽有同符契累朝已來出師誅
暴未有若此之奇速也頃者華風不競中國政微五嶺
三江置諸度外殊文異軌六紀于茲肇啓聖謀驅攘寇
亂荆湖底定南土晏然燕薊之戎汾晉之孽燕巢幕上
朝不謀夕邊事少間理道無壅嚴恭寅畏一日萬機動
於已而泰於人儉於躬而豐於物明四目而高視達四
聰而遠聽不侮鰥寡恤天窮也信及豚魚遂物性也惜

力念耕耘之苦推食閔介冑之勞法家之流既峻且密
乃詔大理重正刑名俾盡哀矜務從寬簡減盜竊之罪
緩鹽麴之禁好生之德通於神明若乃昧爽丕顯坐而
待旦商湯之戒慎也側身損己長轡遠馭漢文之化導
也循名責實信賞必罰建武之法制也果敢決斷從善
如流貞觀之風烈也帝王之道於茲備矣太平之業於
茲成矣於是祇見清廟致其孝享圓丘展禮對越上玄
一獻而天帝降祉再獻而神人以和三獻而萬祿攸報

祥風拂袂休氣繞壇熙熙怡怡羣心胥悅國家大慶衆
庶共之肆赦覃恩俾民更始與天道合謂之應天天無
不覆謂之廣遠無不至謂之運博施濟衆謂之仁智周
萬物謂之聖化成天下謂之文保大定功謂之武其德
無際謂之至德臣等上尊號曰應天廣運仁聖文武至
德皇帝伏惟垂日月之明監億兆之情凝旒端委昭受
鴻名如山嶽之固如松栢之貞乾健不息品物咸亨承
天之祐萬壽千齡 王珪上仁宗徽號冊文曰孝孫嗣

皇帝臣謹再拜稽首言曰臣伏觀古先哲王莫不大名
發於前而大惠昭於後其法皆本於至公而不可易至
後世臣子又欲盡報上之道以謂君德甚盛其言不足
以包衆美於是至郊加誅之文夫欲推事存之禮述
追遠之志則奉素享之榮號益新紀之鴻烈謀羣公請
太室洋洋乎際天接地而震顯之不亦當靈心而傳古
誼乎恭惟仁宗皇帝躬清明之資賦神睿之略乾行施
之不息仁性根於自然時乘六飛端御大器知窮八荒

而不見其迹澤及萬彙而不居其功爾乃簡拔峻賢放
遠邪佞宥恕刑獄懷保鰥寡賞不徇所私罰必當於理
興農桑之本務緝禮樂之墜文有慘怛好生之心吏或
誤入重辟必終身見斥有寬裕從諫之度言者屢進狂
直必曲意見容念兵革之傷夷則不殺而服念稼穡之
勤勞則罔寧於勉矧履天下之尊而持之以抑畏饗天
下之富而寶之以儉素加以夙夜齋栗事天之誠盡霜
露怵惕念親之感深方朝廷之久安迺大革因循而聖

政又新為社稷之重計迺前定禍亂而皇嗣蚤立故四十二年仁恩川流涵濡薰蒸格於上下日月華風雨均四時和百穀蕃蟲魚遂性自安川藪之游男女潔誠更趨耕織之樂固有幽遐荒昧之俗不約而子來奇偉倜儻之瑞不刼而特見者矣丕赫哉憲度鴻明聲文沛施自載籍之傳蓋未有休功盛業可加於茲也 元王構上太祖徽號冊文曰伏以恢皇綱廓帝紘建萬世無疆之業鋪宏休揚偉績遵累朝已定之規式當繼統之元

蓋有稱天之誅孝弗忘於率履制庸謹於加崇欽惟太
祖淵量聖姿睿謀雄斷沛仁恩而濟屯厄振羈策以馭
豪英惟解衣推食於初年見君國子民之大略元符額
握諸部悉平黃鉞載麾百城隨下裔土兼收於夏孽餘
波克殄於金源蕩蕩乎無能名迹遠追於湯武灝灝爾
其為訓道允協於唐虞根深峻嶽而維者四焉囊括殊
封而統之一也肆予小子承此丕基兩祗見於太宮恒
優臨於端宸祚垂鴻兮錫裕尚期昭報之申牒鏤玉以

增輝敢緩彌文之舉 姚燧上仁宗尊號冊文曰昔我

世祖既平炎趙質之於書幅員廣長振古無倫覆燾之
下八紘萬國莫敢不庭何獨一王西北岸然憑道阻脩
方命正朔德綏之而不摯威董之而不驚夫豈不能聲
罪致罰深入其地終以聖人親其宗親包荒有年成宗
繼序久憤驚頑天鑒昭明於裕皇孫獨異陛下授以太
祖皇帝信寶撫軍漠北時未及冠承命即行其視萬里
莽闕寒冽之鄉不遠不難如堂適庭至則獎厲諸軍脩

明法志簡拔果毅均苦分勞解衣燠寒推食飫饑洗洗
汔汔士氣日作睿算伐謀待寇歲至奪人以先身踐戎
行霆馳電擊大北其羣虛已不矜日慎一日始終十年
不徂屢勝狂狡不懲悉銳來加當以選鋒用間出奇盡
襲輜重彷彿無歸度不能軍耄倪累累降口百萬致茲
救寧平四十年未靖之梗成兩祖宗未究之志天下之
人聞其風聲思覩天光者顚顚翹翹九圍一心握是乾
符歸正宸極弛武事之夙習洽新化以文治立愛自親


曾未旬浹上尊太后問安以時下建儲宮庶政是先又
舉列聖未遑之典欽崇元祀玉璫黃流薦裸太室還蹕
龍興徘徊太祖龍旂九旂勗金于斯肇基帝業為城中
都又以孔子垂範百王將二千年而顯謚未稱加大成
於至聖文宣王上立勞於軍與凡庭臣悉大賚之間歲
不登既賑既恤虞施未博民罹罪罟再肆大宥至德難
名赫赫巍巍惟天為大挂一漏萬井觀如斯求可盡臣
下歸美報上者惟是微稱謹上尊號曰統天繼聖欽文

英武大章孝皇帝立心天地立極生民茂對鴻名于億
萬年

御定淵鑑類函卷四十二

謹案卷四十一第三十五頁後八行陛下握元命
之符刊本握訛渥今改





總校官庶吉士臣張能照

校對官編修臣裴謙

謄錄監生臣金拔